

《大方廣圓覺修多羅了義經導讀》補充講表

◎附表十三（以下糅合諦閑大師《圓覺經講義附親聞記》）

○丙二、示漸修：言漸修者，是圓漸，非漸漸也。

○大悲世尊！願為此會諸菩薩眾，及為末世一切眾生……作何方便，普令開悟？

◆急欲求佛憐憫，故稱大悲世尊。此會諸菩薩眾：指現前新學。末世一切眾生：指未來初心。願為及為者，二俱當被之機故。

◆演說修行漸次者，謂其最初入手，必有由漸當急，次第入門，故先請示令知。思惟者，用心參究。眾生不知，故代問云何。住持者，不被境遷。

○世尊！若彼眾生無正方便，及正思惟……為我等輩及末世眾生，假說方便。

◆正方便：即指修行漸次，如楞嚴前二漸次，不爾則入手無門。正思惟：如第三漸次，違

其現業，不爾則覺路難通。雖聞如幻，堅執難融，故曰：**迷悶**。迷者迷於我，以我相能亂心故；悶者悶於法，以法相能覆性故。為此二相迷悶，故於圓覺不能悟入。

◆慈：與開悟之樂，悲：拔迷悶之苦，故請願興。假說方便：不是單請漸次，蓋通約住持等，皆方便。良以圓覺本有，我法元空，實不假於方便。其如現會根有利鈍，末世惑有厚薄。根利惑薄者，聞此三昧，已搖鞭影。根鈍惑厚者，反生迷悶。於覺不悟，是故以假說方便為請。蓋是求佛於無方便中，權宜巧設，令彼根鈍者，迷悶釋，覺性入。

○彼新學菩薩及末世眾生，欲求如來淨圓覺心……堅持禁戒，安處徒眾，宴坐靜室。

◆文分為二：初酬修行請：欲求如來覺心者，謂如來本起因地最初發心，先以直心，正念真如，始能遠離諸幻。汝等欲求，非此不可，故以「應當」誠之。

次酬漸次請，謂行遠自邇，登高自卑，汝等果能欲求，亦應有先依者。

◆奢摩他此云：止，謂外止一切惡事不應行，內止一切惡念不應起。如來於因地中，最初亦先依此，故是如來行也。禁戒者，三聚條多，難盡縷析。若約其最所發禁者，大則十重，小則四夷。堅持者，如惜浮囊，絲毫無容犯故。徒眾者，從學法侶。令其四事不闕，無所伎求，名為安處。處，猶住也。設不令其安處，於自禪觀時，未免有所擾故。宴坐者，宴安而坐，所謂身體及手足，靜然安不動。且約因戒生定，以為入觀之方便門也。靜室，即清淨房舍。應當離葷臭，絕喧囂，故云：靜也。

◆欲求如來淨圓覺心，全以正念為根本。正念者，無念也。正念一起，如皎日當空，眾林失白，那有不能離幻之理。以正念為本，方可用正思惟功夫。

◆以下即言修持方法。若就止觀分說，則奢摩他是止，謂體真止，方便隨緣止，息二邊分別止。若止觀雙說，則奢摩他是體真止，觀是空觀。從一止一觀下手，用功到究竟，則一止即三止，一觀即三觀。若僅依奢摩他行，則惟一止一觀。依如來奢摩他行，則舉一

即三。止即定，觀即慧，止觀雙修，即定慧雙得。依如來奢摩他行，亦須從戒入手，可見戒為最要。如渡海之浮囊，如長夜之寶炬，如遠行之導師。

◆此章修行漸次功夫，所謂思惟，所謂住持，以奢摩他直貫到底，實為一空觀也。

○恒作是念：『我今此身四大和合，所謂髮毛、爪齒……畢竟無體，和合為相，實同幻化。

◆恒念：謂二六時內，四威儀中，念茲在茲，不可須臾離也。先觀身者，以我執偏重，急先務也。四大和合句是總觀。謂堅、濕、煖、動、假合為身，此易知者。

◆四大各離，身在何處？只此一言，教下手習觀時也。正觀之時，各有所歸，即名為離。離則無身，故徵以當在何處？實顯其無處也。處尚不有，體復何云？故曰即知無體。和合者，四大假合。為相者，幻妄稱相。相即無相，故曰：同幻。

◆恆即是正，念即思惟。念茲在茲，不令邪思入。我今此身至實同幻化，實一參究之話頭。